

PRASARANA BEKALAN AIR DINAIK TARAF

Negara alami krisis jika rakyat tidak berhati-hati hm 1/4/08

"APA yang sedang berlaku kepada sumber air di negara ini amat menyentuh hati saya - ia sangat menyedihkan. Pencemaran yang berlaku membunuh kehidupan di air," kata Perdana Menteri, Datuk Seri Abdullah Ahmad Badawi ketika membentangkan usul Rancangan Malaysia Kesembilan (RMK9) di Dewan Rakyat, di sini, semalam.

Menurut beliau, sungai pada satu ketika dahulu kaya dengan kehidupan seperti ikan, udang dan tuntung yang menjadi sumber bekalan protein memenuhi keperluan manusia.

Katanya, negara akan mengalami krisis air dalam tempoh tidak terlalu lama jika rakyat tidak berhati-hati.

"Segala-galanya sudah pupus. Kejernihan air sungai menjadi keruh dan kini berbau busuk. Segala bala ini

adalah balasan bumi kepada perbuatan zalim manusia yang diperlihatkan Illahi," katanya.

Abdullah berkata, aktiviti membalak yang berlebihan, pencerobohan ke kawasan tadahan air, kerakusan manusia yang tamak kebendaan, perbuatan membuang sampah-sarap ke sungai dan longkang, adalah antara puncanya.

"Insafilah akan betapa perlunya anugerah Illahi ini dihormati dan dipelihara baik. Lihatlah penderitaan yang dihadapi ramai penduduk dunia yang ketandusan air," katanya.

Beliau berkata, Suruhanjaya Perkhidmatan Air Negara (SPAN) akan mengawal selia mutu bekalan air di seluruh negara bagi menjaga kepentingan pengguna, dan prasarana bekalan air akan dibina

serta dinaik taraf.

Katanya antara projek utama yang akan dilaksanakan termasuk Projek Penyaluran Air Mentah antara Negeri dari Pahang ke Selangor, Skim Bekalan Air Triang dan Batu Hampar di Negeri Sembilan, Sandakan Fasa 2 di Sabah dan Loji Rawatan Air Langat Fasa 2 di Selangor.

Kerajaan akan turut memperuntukkan RM1.48 bilion bagi pemulihan rangkaian pengagihan bagi mengurangkan kadar air tidak terhasil daripada 38 peratus pada 2005 kepada 30 peratus menjelang 2010.

Perdana Menteri berkata, kerajaan akan membelanjakan hampir RM4 bilion bagi projek tebatan banjir di bawah RMK-9 berbanding RM1.79 bilion dalam Rancangan Malaysia Kelapan (RMK-8).